

VERJAERSVERZIETE

Zeï mae, zeï mae
ik komme wè laeter
ommes 'k bin à glad gèên praeter
ik gae nie graeg van uus
zitte liever tuus.

Zeï noe, zeï noe
wà mò je op een fêêsje
't is uusje, boampje, bêêsje
is 't gèên slap geouw' oer
dan is 't wè opgeleid pandoer.

Zeï mae, zeï mae
'k weet 'oe of à dà gaet
'oarendol wor je van dà geblaet
d'n êênen ei piene in z'n poken
d'n oaren z'n klompe is hebroke.

Zeï noe, zeï noe
een schiefje woste, een stikje kaeze
van 't gebak à opgeblaeze
glasje bowl, joenge klaere, 't wor laeter
van Zwarte Kip krie 'k à een kaeter.

Zeï mae, zeï mae
ik komme wè laeter
ik bin een bitje schoef ommes
een schriever, gèên praeter.

Arie de Viet